

გამომცემი: ა(ა)იპ „ქართული მედია ჯგუფი“, კატო მიქელაძის გაზეთის მიხედვით

ს მ ა ს

21 ივლისი, 2023 წელი. გაზეთი ვრცელდება უფასოდ

ქართული ქალისა

№5

გაზეთი გამოდის თვეში ერთხელ

ევროკავშირის მხარდაჭერით გამართულ შეხვედრაზე არასამთავრობო ორგანიზაციებს, გაზეთი „სმა ქართული ქალისა“ დაურიგდათ

„სამოქალაქო საზოგადოების გაძლიერება ქალთა მიმართ ძალადობის პრევენციის საკითხების ადვოკატირებისთვის“ – ეს იყო ტრენინგის თემა, რომელსაც საქართველოს 9 რეგიონიდან 20-მდე უფლებადამცველი ესწრებოდა.

ქალთა მიმართ ძალადობის პრევენციის მიზნით მომუშავე სამოქალაქო სექტორის წარმომადგენლებთან შეხვედრა მიზნად ისახავდა, რეგიონული არასამთავრობო ორგანიზაციების გაძლიერებას ადგილობრივ თვითმართველობებთან ადვოკატირების კუთხით, ასევე იმ საჭიროებების გამოკვეთას, რაც ადგილობრივ დონეზე ქალთა მიმართ ძალადობის საკითხებთან მიმართებით არსებობს.

ტრენინგი GCRT-ის და Sapari-ს ორგანიზებით ჩატარდა, რომელსაც ლელა ცისკარიშვილი და ბაია პატარია უძღვებოდნენ.

ევროკავშირის მიერ მხარდაჭერილი პროექტის ფარგლებში გამართულ შეხვედრას „ქართული მედია ჯგუფის“ ხელმძღვანელი, ნინო ჩიბჩიურიც დაესწრო, რომელმაც საზოგადოებას, გაზეთი „სმა ქართული ქალისა“ წარუდგინა და რეგიონში ორგანიზაციის მუშაობის მიმართულებები გააცნო.



საოკუპაციო საზთან მცხოვრებ ქალებს სამედიცინო მომსახურებას უფასოდ გაუწევენ

22 ივლისს, 12:00-დან 16:00 საათამდე, ერგენტის და მიმდებარე სოფლების მაცხოვრებლებს, სამედიცინო მომსახურების მიღება უფასოდ შეეძლებათ. სამედიცინო აქცია ერგენტ-მამისაანთუნის საჯარო სკოლის შენობაში გაიმართება. მოსახლეობა ისარგებლებს შემდეგი უფასო სამედიცინო სერვისებით:

- ოჯახის ექიმის კონსულტაცია – ყველა ასაკის პირებისთვის, საჭიროებისამებრ დაინიშნება სწორი მკურნალობა.
- ექიმ გინეკოლოგის კონსულტაცია-მოზარდი გოგონებისთვის; ფერტილური ასაკის ქალებისთვის; ორსულებისთვის; მენოპაუზის პერიოდში მყოფი ქალებისთვის.
- ექიმ ექოსკოპისტი-ულტრაბგერითი კვლევები მოზარდი გოგონებისთვის; ფერტილური ასაკის ქალებისთვის, ორსულებისთვის, მენოპაუზის პერიოდში მყოფი ქალებისთვის.
- ფსიქოლოგის კონსულტაცია-ყველა ასაკის პირებისთვის.

„ასოციაცია „HERA XXI“ მადლობას უხდის გორის მუნიციპალიტეტის სოფელ ტირძინის ტერიტორიული ერთეულის ხელმძღვანელობას და საჯარო სკოლის ადმინისტრაციას აქციის ხელშეწყობისთვის. საქართველოს არასამთავრობო ორგანიზაცია ასოციაცია „HERA XXI“ 1998 წლიდან აქტიურად მოღვაწეობს რეპროდუქციული ჯანმრთელობისა და უფლებების სფეროში. ასოციაცია მხარს უჭერს რეპროდუქციული ჯანმრთელობის და ჯანსაღი ცხოვრების შესახებ ინფორმაციის, ყოვლისმცველი განათლებისა და ხარისხიანი სერვისების მიწოდებას, მოსახლეობის ყველაზე დაუცველი და მონყველადი ჯგუფებისთვის, – წერია ორგანიზატორთა მიერ გავრცელებულ განცხადებაში.

სამედიცინო აქცია ეწყობა საქართველოს არასამთავრობო ორგანიზაცია ასოციაცია „HERA XXI“-ის ინიციატივით, ზურაბ საბახტარაშვილის რეპროდუქციული კლინიკის ჩართულობით და მედია სააგენტო „NEO TV“-ს თანამშრომლობით.

ნინო ჩიბჩიური



საშურში „ქალთა ოთახი“ იხსნება – რას ითვალისწინებს ახალი სერვისი?



საშურში „ქალთა ოთახი“ იხსნება. ის ადგილობრივი თვითმმართველობის ორგანოს, მუნიციპალიტეტის მერიას დაექვემდებარება და ერთ-ერთი საინფორმაციო-საკონსულტაციო რესურსცენტრი იქნება. საშურის საკრებულოს თავმჯდომარის, ნინო ლიპარტელიანის ინფორმაციით ამ გადაწყვეტილების მიზანია ადგილობრივი მოსახლეობის, განსაკუთრებით კი ქალების დახმარება, მუნიციპალიტეტთან ურთიერთობაში.

„ქალთა ოთახი გაზრდის და ნაახალისებს ქალების და მამაკაცების თანაბარ მონაწილეობას ადგილობრივი თვითმმართველობის დონეზე გადაწყვეტილების მიღების პროცესში (საკრებულოს და მერიის სხდომებზე, ასევე დასახლების საერთო კრებებში მონაწილეობა და ა.შ.)“, – აღნიშნა მან.

„ქალთა ოთახის“ საშუალებით ადგილობრივი ხელისუფლება საკუთარ მოსახლეობას (განსაკუთრებით, ქალებს და გოგონებს) დამატებით საინფორმაციო-საკონსულტაციო მომსახურებას, ასევე თავისუფალ, ღია სივრცეს შესთავაზებს დასვენებისა და სოციალურ-ეკონომიკური აქტივობისთვის.

ქალებს ამ სივრცეში შეეძლებათ შეხვედრების ჩატარება, ინიციატივების გააზრება, ექნებათ საშუალება ისარგებლონ „ქალთა ოთახის“ სერვისებით და მიიღონ კონსულტაცია მათთვის საჭირო საკითხებზე.

საშურის საკრებულოს თავმჯდომარის, ნინო ლიპარტელიანის განცხადებით, „ქალთა ოთახი“ პარლამენტის წევრის, ნინო ნილოსანის ინიციატივით, უკვე ფუნქციონირებს საქართველოს რამდენიმე ქალაქში, მისი გახსნა შიდა ქართლის სხვა მუნიციპალიტეტებშიც იგეგმება.

შორენა ბიჭიკაშვილი



ქალი სასწრაფო დახმარების სამსახურიდან, რომელიც გორში, 2008 წელს პროფესიულ მოვალეობას დაბომბვებში ასრულებდა

„გორი რომ პირველად დაბომბა, სახლში ახალი მისული ვიყავი, მაშინვე სამსახურში დავბრუნდი და შემდეგ, ერთი წუთით აღარ დამიტოვებია იქაურობა“, – დალი ვანიშვილი გორის სასწრაფო სამედიცინო დახმარების შენობის დაბომბვას იხსენებს.

ამბობს, რომ მოსალოდნელ საფრთხეზე არც უფიქრია, ისე დატოვა ოჯახი და იქ მივიდა, სადაც 45 წელი გაატარა:

„ჩვენ სულ ასე ვართ, არასდროს ველოდებით, როდის დაგვირეკავენ, როცა ვხვდებით რომ საჭირო ვართ, ჩვენი მივდივართ. შევდიოდით ცხელ ზონებში და იქიდან გამოვყავდა ავადმყოფები... არ ვფიქრობდი მაშინ ჩვენ სიცოცხლეზე, ცხელ წერტილებში როცა მივდიოდით, შეიძლება ჩვენც ავფეთქებულიყავით.“

ყველაზე რთული გასახსენებელი 9 და 12 აგვისტოა. ამ დროს განსაკუთრებით დიდი იყო დაჭრილთა რაოდენობა

დაბომბვების შედეგად. სასწრაფოს შენობაც დაიბომბა და ექსტრემალურ სიტუაციაში ქალაქის საავადმყოფოს შენობაში გადავიტოვეთ მუშაობა. გორის ცენტრში 3 გვამი იყო როცა გამოგვიძახეს და მივედი, მათ შორის ერთი უცხოელი ვიდუო ოპერატორი. დაჭრილები გადაგვყავდა ჰოსპიტალშიც და ქალაქის საავადმყოფოშიც, ახლანდელი „გორმედის“ შენობაში. იმ პერიოდში კოლეგა ჩვენც დავკარგეთ. ის პროფესიული მოვალეობის დროს გარდაიცვალა. რამდენი ხანიც არ უნდა გავიდეს და აქედანაც რომ ნავალ, ყოველთვის მემახსოვრება ჩვენი სასწრაფო დახმარების სამსახურის თანამშრომელთა გმირობა 2008 წლის აგვისტოს ომში“, – ამბობს დალი ვანიშვილი.

მისი ყოველი სამუშაო დღე ბრძოლაა – სიცოცხლის გადასარჩენად და მაინც, ორ ომგამოვლილს, სჯერა, რომ მშვიდობით მოვიგებთ ომს!

ნინო ჩიბჩიური

„აბვისტოს ომში შვილი დავკარგე, ამ დრომდე უხედებოდ ვითხოვ, რომ სოფლის სკოლას მისი სახელი მიენიჭოს“

ჩემი შვილი გელა თიგვიშვილი ვაზიანის სამხედრო ბაზაზე მსახურობდა, თუმცა მანამდე სამხედრო პოლიციის თანამშრომელი იყო. აფხაზეთის ომშიც მონაწილეობდა. როდესაც აფხაზეთში წავიდა მეუღლე ფეხმძიმედ ჰყავდა. ჩუმად წავიდა, იცოდა ვინერვიულებდი და არ გამაფრთხილა, არც დაურეკავს. მხოლოდ მაშინ გავიგე, როდესაც შინ დაბრუნდა.

ამის შემდეგ იყო კოსოვო, სამშვიდობო მისიით გელა იქ შევიდი თვე იმყოფებოდა.

კოსოვოდან უვნებელი დაბრუნდა და ცხინვალში წასვლა გადაწყვიტა, ამ დროს კი ომი დაიწყო. 2008 წლის 5 აგვისტოს შემდეგ ჩემი შვილი აღარ მინახავს. 7 აგვისტოს დილით დამირეკა და მითხრა დედა ცხინვალში მივდივარ, მაგრამ ჯერ გორში ვარო. ვკითხე, რატომ მიდიოდა და თქვა, რომ მალე დაბრუნდებოდა. მეორედ საღამოსაც დამირეკა და გამაფრთხილა ტელეფონს ვთიშავ და აღარ დამირეკო, მე კი მის მერე ვრეკავდი...მაგრამ ამაოდ... ჩემი შვილის ხმა აღარ ვამიგია. არცერთი შვილი არ მყავდა სახლში. ერთი ახალგორში იყო, მეორე გორში დაბომბვის დროს დაჭრილებს ეხმარებოდა. ერთი თვე ჩემი შვილები არ მინახავს, მარტო ვიყავი რუსებით გარშემორტყმულ სოფელში.

აგვისტოს ბოლოს წამიყვანეს სამხარაულის ექსპერტიზის ბიუროში დნმ-ს ანალიზის გასაკეთებლად, მაშინ კი ყველაფერს მივხვდი. ანალიზი მაშინ უარყოფითი იყო.

დადებითი პასუხი ანალიზმა განმეორებით ცდაზე აჩვენა. 2012 წლის 4 აგვისტოს მიმიყვანეს ჩემი შვილი დალუპული, თუმცა ისე დავიტირე, რომ მისი ცხედარი თვალთ არ მინახავს. ხანდახან ვფიქრობ იყო თუ არა ის ნამდვილად ჩემი გელა.

ამდენი უბედურების შემდეგ მინდა ჩემი შვილის სახელმა იცოცხლოს. 2012 წლიდან სკოლის დირექტორს ვთხოვ, რომ გელას სახელი მიენიჭოს სოფლის სკოლას, თუმცა უშედეგოდ. რატომ უნდა დაიკარგოს ჩემი შვილის სახელი ასე, ის ხომ გმირი იყო და სამშობლოს დასაცავად თავი განიარა. მინდა რომ მისმა შთამომავლობამ იცოდეს ვინ იყო ჩემი შვილი. ყურადღება არავის მოუქცევია. განცხადებაც დავეწერე განათლების სამინისტროში, თუმცა დირექტორისგან ამაზეც საყვედური მივიღე. ხელმოწერებიც შევაგროვე და სოფელში ყველას სურვილია გელას სახელი მიენიჭოს კოდისწყაროს სკოლას. მას მერე ვიბრძვი, გმირთა სასაფლაოზე ვიყავი და მინისტრს შევხვდი, ვუთხარი ჩემი ინიციატივა და მითხრა, რომ ყველაფერი კარგად იქნებაო. მერე პრემიერ-მინისტრს მივწერე წერილი თხოვნით. ჯერ ჩემი მცდელობები უშედეგოა. ბოლომდე ვიბრძობ, არ მინდა ისე მოვკვდე, რომ ეს ოცნება არ ავიხდინო. ჩემი შვილი იყო იმის ღირსი, რომ მისი სახელი თაობებს დარჩეს...

ქეთევან ნიკოლეიშვილი-თიგვიშვილი
კასპის მუნიციპალიტეტის სოფელი კოდისწყარო

„ცრემლის გარეშე შვილს დაბადების დღეს ვერ ვულოცავ, რადგან მან პირველმა დაამარცხა ცრემლის ბოროტება 2008 წლის 7 აგვისტოს, თავისი სიცოცხლით“



რუსების ომი ალბად პირველი ქეთიმ დაამარცხა თავისი დაბადებით, ჯერ ისედაც სროლებში ვიყავით და თან ამ დროს შემეძინა მესუთე შვილი, რომლის მოფერებაც ვერ გავიგე ომის დღეებში, იმიტომ რომ გაქცევაზე და გადარჩენაზე გვექონდა ორიენტირება გაკეთებული. გადაგვეჩინა ბავშვები და გადაგვეჩინა საკუთარი თავი, ოჯახის წევრები.

7 აგვისტოს ღამე, 12-ს აკლდა ზუსტად 15 წუთი რომ მეყოლა ქეთევანი და არ ვიცი რა გადავიტანე იმ დროს. მე ვიყავი გამოკეტილი სამშობლოს კედლებში ორი ბავშვი დედასთან მყავდა გორში და ორი პატარა დედამთილთან და მამამთილთან ერთად ტირინისში გავიყვანეთ, ვითომ სამშვიდობოს. მძიმე სიტუაციაში იყო თვითონ ტირინისიც. სატანკოში რომ ბომბები ჩამოყარეს, დავინახე როგორ იშლებოდა ყვავილივით კვამლი. ეს ამხელა მინები რომ წამოვიდა მსხვრევით, ყველაფერი გადამეკეტა, ვერ ვაზროვნებდი, მარტო ბავშვს მოვკიდე ხელი და გავბრძოდი დაბლა. დეფორმაციამ გაჭედა, თუ ჩვენ აღარ გვექონდა ძალა, რომ კარები გაგვეღო და ერთი, რაც მომაფიქრდა, დავინახე რომ დედაჩემი და ჩემი გოგო მოდიოდნენ გავალე ფანჯარა და გადმოვხტი ბავშვით ხელში.

აბსოლუტურად არაფერი არ მტკენია თუ ვერ ვიგრძენი არ ვიცი, წავედი თბილისში. რუსები რომ გავიდნენ, მაშინ დავბრუნდით სოფელში. თავში მიტრიალებდა ებრაელების წყველა „შენს კიბეზე ვნახე ბალახი გადავლილი“ და ძალიან მეშინოდა

ნოდა ბავშვობიდან ამ წყევლის. სულ ვიძახდი, ნეტა კიბეზე და ეზოში ბალახი არ იყოსო ვფიქრობდი, მაგრამ რომ შემოვედი უკვე წარმოვიდგინე, რანაირი იქნებოდა ჯოჯოხეთი. აი ის იყო ჯოჯოხეთი, სადაც შემოვედი. ჩამოკონიალებული ჟესტები სახურავების და თუ ნიაფი იყო, ეს რომ მიეჯახუნებოდა დანგრეულ კედლებს, ჰქონდა საშინელი ხმა. სანამ ცოცხალი ვარ ალბათ არ დამავიწყდება. თან რომ გუუბნებანი შუაში არ იაროო, გაფრთხილებს პოლიცია, შეიძლება სნაიპერი გიყურებდეს და... როგორია? და მაინც მოდიხარ, იმიტომ რომ გინდა შემოხვიდე.

შემოვედი და ერთადერთი, რაც ამ ნანგრევებში გადარჩა ჩემი პიანინო იყო, ბავშვობის დროინდელი, რომელიც სამი თვის ვიყავი მამამ რომ მიყიდა. ძალიან ძველი პიანინოა, ხეა მასიური და ეტყობა ვერ მოერივნენ, რომ გაეტანათ და ფეხი მოსტეხეს, ფეხით ჩარეგვეს სიმები. წიგნები მქონდა ძალიან ბევრი და შუაზე იყო დახლებილი და რუსული წიგნებიდან, რაც ვიზუალურად ლამაზი იყო, ეგენი წაიღეს. ქეთი მართლა ომის ტოლია დაბადების დღე რომ მოსდის, მოგონებებთან ერთად ჯერ ალბათ, უნდა ვიტყვო და მერე ვულოცავ. იმდენად მაქვს შიში გამჯდარი, რომ თითქოს იმ მილოცვის მეშინია. მთელი ცხოვრება ვიამაყებ, რომ პირველი ქეთიმ თქვა უარი სიკვდილზე და დაამარცხა რუსეთის ომი, დაამარცხა თავისი დაბადებით და სიცოცხლით.

მაგული ოქროპირიძე
სოფელი ერგნეთი



15 წელი დევნილობაში – რა შეიცვალა 2008 წლის შემდეგ ომგამომავალი ქალის ცხოვრებაში?

41 წლის ვარ და უკვე 15 წელია – დევნილი მქვია. 2008 წლის აგვისტოს ომის შემდეგ ზურვალეთის დევნილთა დასახლებაში ვცხოვრობ. დავოჯახდი, მაგრამ ჩემი პირადი ცხოვრება არ წარმართა კარგად. ახლა ჩემს შვილთან ერთად ვცხოვრობ. წლების მატებასთან ერთად ცხოვრებას სხვანაირად ვუყურებ, ახლა მეტი საზრუნავიც მაქვს თუმცა, უკეთესობა არის ის, რომ ოჯახის სხვა წევრები გაიზარდნენ და ისინი უკვე ოჯახში შემომტანები არიან. მატერიალურად მენდობიან და საკუთარ თავსაც ირჩენენ.

თავდაპირველად ძალიან გაგვიჭირდა. დევნილობის პირველ წლებში არც ჭურჭელი გვექონდა, არც ლოგინი და არც სხვა საყოფაცხოვრებო ნივთები. ახლა კი ამ მხრივ უკეთესი მდგომარეობა გვაქვს. დევნილთა ნაწილი სხვადასხვა საქმით დაკავდა. განათლება მიიღეს და ყველაფერი შეიძინეს. ზოგმა ბიზნესიც წამოიწყო. მათ გაეზარდათ თვითშეფასება წლების შემდეგ და მიხვდნენ, რომ შეუძლიათ მეტი გააკეთონ და განვითარდნენ. შეიცვალა ქალების მდგომარეობაც. მათ იციან საკუ-

თარი უფლებების შესახებ და ამოიღეს ხმა ძალადობის წინააღმდეგ. მათ შორის ვარ მეც. ყოველთვის ვფიქრობდი, რომ ძალადობის მსხვერპლი არასოდეს ვიქნებოდი, თუმცა ამ რეალობის წინაშე დავედქი, გამიჭირდა თუმცა ვიბრძოლე, ხმა ამოვიღე და ჩემს თავს ვუშველე. მე უკვე აღარ მემინია, ყოველთვის ვიბრძოლებ ძალადობის წინააღმდეგ, რადგან სწორედ ჩემზე განხორციელებულმა ძალადობამ შეინარა ჩემი ჯანმრთელობა და ოჯახის წევრების სიცოცხლეც. თუმცა სამწუხაროა, რომ ჩემს გარშემო კიდევ მრავლადაა მსგავსი ფაქტები, და ისევ არიან ქალები, რომლებიც ამ საკითხზე დუმობენ ამჯობინებენ და უსიტყვოდ ითმენენ სხვადასხვა ფორმით ჩაგვრას.

ბევრჯერ ჩავრეულვარ, თუმცა ისევ მათშია პრობლემა და არ უნდათ ამ სიტუაციას თავი დააღწიონ. შესაძლოა ეს გამოიწვიოს გარკვეულწილად დევნილობამაც და მიყენებულმა სტრესმა, რომ კაცები განდენ მოძალადეები, თუმცა ჩემი მეუღლე არ ყოფილა დევნილი და ძალადობდა ჩემზე. ჩვენთან მუდმივად მუშაობდნენ ფსიქო-



ლოგები, როგორც ქალებთან ისე ბავშვებთან, თუმცა, შემდეგ მოქალაქეები აღარ აქტიურობდნენ და თვითონაც აღარ იყვნენ ჩართულები, რომ მიეღოთ ფსიქოლოგის მომსახურება.

ასევე იყო ბევრი პროექტი, სადაც შეეძლო ჩართვა, თუმცა არ დაინტერესდნენ. დევნილთა ნაწილს არ სურს თავისი ცხოვრება შეცვალოს და ამ რეალობას არიან შეგუებული. ქალების ნაწილს ქმარი არ

აძლევდა უფლებას, ზოგს დედამთილი, ნაწილი კი თავად არ იყო დაინტერესებული რომელიმე აქტივობაში მიეღო მონაწილეობა, რაც ძალიან სამწუხაროა. ვფიქრობ, საჭიროა მათი მეტად დატრენინგება და საზოგადოებაში ინტეგრაცია. მათი ცნობიერების ამაღლება აუცილებელია, რომ იბრძოლონ საკუთარი უფლებებისთვის.

იზა ორობრიძე
ზურვალეთის დევნილთა დასახლება

ქალთა უფლებების დაკნინებას, ძალადობის ფაქტებზე არასათანადო რეაგირება იწვევს

დღეს საქართველოში და არა მხოლოდ აქ, ქალთა მიმართ ოჯახში ძალადობა ერთ-ერთ აქტიურ თემას წარმოადგენს. ძალადობას ძველი დროიდან მოყოლებული არაერთი ქალი აქტივისტი ებრძოდა, ეს ბრძოლა დღესაც გრძელდება. მიუხედავად იმისა, რომ დღეს ეს პრობლემა ძველ დროსთან შედარებით შემცირებულია, მაინც არსებობს ჯგუფები, სადაც ქალებს საკუთარი ადგილის დასაკავებლად ჯერ კიდევ დიდი ბრძოლა უნევთ. საკუთარი ადგილისა და უფლებების დამკვიდრებისთვის ქალები როგორც უკვე ვთქვით, ძველი დროიდან იბრძვიან.

ერთ-ერთი მათგანი ცნობილი მწერალის, უილიამ შექსპირის და, ჯუდიტ შექსპირი იყო. რა მოხდებოდა ჯუდიტ შექსპირი რომ ისეთივე ნიჭიერი ყოფილიყო როგორც მისი ძმა? რა თქმა უნდა მას საზოგადოება არ მიიღებდა, მხოლოდ იმ მიზეზით, რომ ის ქალი იყო და მის „მოვალეობად“ მხოლოდ ოჯახისა და ბავშვების მოვლა-აღზრდა მიიჩნეოდა. სამწუხაროდ, ჯუდიტის სიცოცხლე მალევე დასრულდა, რადგან სქესის გამო ის თეატრიდან უარით გამოისტუმრეს. პასუხს ვერ ვცემ რატომ ხდებოდა მუდამ ქალთა უფლებების დაკნინება? რატომ ვერ ბედავდნენ ქალები ხმის ამოღებას თუ მათ ეს ყველაფერი აღიზიანებდათ? ყველაზე სამწუხარო ფაქტი ისაა, რომ ეს ყველაფერი დღემდე გრძელდება. ეს არის ის, რის გამოც ძირითადად ქალების უმრავლესობა მალავს ძალადობის ფაქტებს, სამწუხაროა, რომ საქართველოში გამსაკუთრებით კი სოფლად მცხოვრებ მოსახლეობაში, თითქმის არასოდეს არ ხდება რეაგირება ძალადობრივ ფაქტებთან დაკავშირებით მანამ, სანამ მეზობელი არ ჩათვლის, რომ ოჯახში ძალადობის ფაქტზე რეაგირება უნდა მოახდინოს; რომ მშობელმა შვილს ბავშვობიდანვე ასწავლოს პუმანურობა, რომ ქალზე ძალადობა ნათესავის საქმე არ არის და ეს მხოლოდ წყვილის საქმეა, სამწუხაროდ ვერ გავალთ იმ შედეგზე, რა შედეგზე გასვლაც გვსურს.

მოქალაქეებს რომ გვექონდეს უფრო მეტი სამოქალაქო პასუხისმგებლობის გრძობა, დღეს ამ შედეგის წინაშე არ ვიქნებოდი. სამწუხაროა ის ფაქტი, რომ მოსახლეობა მოძალადე ადამიანს ამართლებს და უფრო მეტ სტიმულს აძლევს დანაშაულის ჩასაღწევად. არსებობს კატეგორია ქალების, რომლებიც ძალადობას გამართლებულად თვლიან და ამბობენ, რომ გარკვეულ შემთხვევებში ძალადობა საჭიროც კი არის, მაგალითად, თუ ცოლი ქმარს უღალატებს ქალის ცემა გამართლებულია, მაგრამ თუ ეს მამაკაცის მხრიდან ხდება ამაზე საზოგადოება არაფერს ამბობს.



თავად ქალებიც კი ეგუებიან ამ ფაქტს და ეს ყოველივე სწორი და გამართლებული ჰგონიათ. რაც არ უნდა ვისაუბროთ ამ საკითხზე საბოლოოდ მაინც ცნობიერების პრობლემაზე მივდივართ. მიუხედავად იმისა, რომ უამრავი სტატია თუ ვიდეო რგოლი იწერება ამ საკითხთან დაკავშირებით, შედეგი მაინც დაბალია. სამწუხაროდ, დღეს ქალები ისევ არიან ძალადობის მსხვერპლები, დედა ისევ მალავს რომ მის შვილზე იძალადეს, რათა მეზობლებმა ამ თემაზე არ ისაუბრონ. მეზობელი ისევ თვალს არიდებს ძალადობის ფაქტს, ქუჩაში მოძალადე ადამიანს გვერდს უვლიან და რეაგირება თითქმის არ ხდება. ძალიან რთულია ვისაუბროთ ამ თემაზე ემოციების გარეშე, რადგან ეს უშუალოდ ჩვენ, ქალებს გვეხება. ჩემი აზრით, მხოლოდ ერთმანეთის გვერდით დგომა და პასუხისმგებლობის მაღალი გრძობით შევამცირებთ ძალადობის ფაქტებს და ყველა მოძალადე კანონის წინაშე სათანადოდ აგებს პასუხს. სწორედ ამ რეაგირების შიში უნდა გახდეს პოტენციური მოძალადის მუდმივი საფიქრალი, მაშინ როცა რაიმე ფორმით, ქალის უფლებების შელახვას გადაწყვეტს.

ლიკა ომაძე
სოფელი ფხვენიისი

„გაუნით მოზარდ-ახალგაზრდებს კეთილგანწყობილი სამედიცინო მომსახურება“

„კლინიკაში ცუდი მდგომარეობა იყო, კონსულტაციის დროს ექიმის კაბინეტში უცხო ადამიანები შემოდინდნენ, რალაცას ეტყოდნენ, რალაცას აიღებდნენ, გადიოდნენ. არანაირი ანონიმურობის განცდა არ იყო.“ – ამბობს 26 წლის მარიამი, თბილისიდან.

„მენტრალური ტკივილების გამო გინეკოლოგთან რომ მივედი პირველი მკითხა გათხოვილი ვიყავი თუ არა, კონსულტაციის ბოლოს მეუბნება ერთადერთი შეილო შენ რაც გიმეღის გათხოვებააო. რეგიონში ერთ-ერთი ყველაზე ცნობილი გინეკოლოგია, მას მერე მასთან აღარ მივსულვარ“ – 22 წლის გოგონა, გორიდან.

კონფიდენციალურობის დაცვის გარანტია, ემპათიისა და მხარდაჭერის გრძობა ექიმის პროფესიონალიზმის ერთ-ერთი ყველაზე ღირებული და მნიშვნელოვანი გამოხატულებაა.

ასოციაცია „HERA XXI“ ხშირად მართავს შეხვედრებს რეგიონებში სექსუალური და რეპროდუქციული ჯანმრთელობისა და უფლებების მიმართულებით მოზარდ-ახალგაზრდების ცნობიერების ამაღლების მიზნით. ერთ-ერთი ასეთი შეხვედრისას ახალგაზრდა გოგონამ ისაუბრა იმ ბარიერების შესახებ, რომელსაც სამედიცინო სერვისის მიმწოდებლებთან ურთიერთობისას აწყდებ-

ბიან: ექიმის არამეგობრული დამოკიდებულება პაციენტის მიმართ, ემპათიის ნაკლებობა, სერვისის მიღების კონფიდენციალობის დარღვევა.

ასოციაცია „HERA XXI“ – მა საქმიანობის პერიოდში არაერთი კვლევა ჩაატარა, როგორცაა მაგალითად „ახალგაზრდებში სექსუალური და რეპროდუქციული ჯანმრთელობის სერვისების ხელმისაწვდომობა“ – შედეგებმა აჩვენა, რომ ეს პრობლემა მხოლოდ ერთ რეგიონში არ დგას და ტენდენციადაა ქცეული.

ნაცნობი ექიმთან მოხვედრის და კონფიდენციალურობის დარღვევის შიში განსაკუთრებით რეგიონში მცხოვრებ ახალგაზრდებს აქვთ. მათი თქმით, მაღალია იმის რისკი, რომ ექიმმა მათ შესახებ ინფორმაცია მესამე პირს გაუზიაროს. გარდა ამისა, ხშირად ექიმები კონსულტაციისას კარს არ კეტავენ, სხვადასხვა პიროვნებები შედიან მის კაბინეტში, ასეთ გარემოში კი ფიზიკურად შეუძლებელია კონფიდენციალურობის დაცვა, სწორედ ასეთი შემთხვევების შემდეგად პაციენტი კარგავს ნდობას, როგორც კონკრეტული ექიმის, ისე სხვა სამედიცინო სერვისის მიმწოდებლების მიმართ.

ანი ჯაბახიძე
„HERA XXI“-ის
ახალგაზრდული მუშაკი





„ხალხის აზრს“ შენიშული ქალების მომავალი

თუ გავიხსენებთ ადრინდელ სხვადასხვა შემთხვევას ქალებზე, რომელიც საკმაოდ მტკივნეულ ისტორიებს ასახავს, მოტაცებას უკავშირდება. ქალებს იტაცებდნენ სკოლიდან, ქუჩიდან და ისეთ პიროვნებებზე უწევდათ ქორწინება, რომელთაც არც იცნობდნენ, უკან დაბრუნების ინიციატივა და სურვილი კი ჰქონდათ, მაგრამ ფიქრობდნენ თუ „რას იტყოდა ხალხი“. მაგალითად, 2013 წლის კვლევების თანახმად საქართველო მე-2 ადგილს იკავებდა მოლდოვას შემდეგ, გოგონათა ნაადრევი გათხოვების წილიში. მას მოსდევდა ტაჯიკეთი და თურქეთი. როგორც აღმოჩნდა 20-დან 24-წლამდე ასაკის გოგონების 19% არასრულწლოვანების ასაკში იყო დაქორწინებული.

დღესაც არანაკლებ აქტუალურია მოზარდების ქორწინება, მაგრამ დროთა განმავლობაში უფრო გამკაცრდა კანონი და 2017 წელს სამოქალაქო კოდექსში აღინიშნა, რომ 18 წლამდე ასაკს მიუღწეველ პირთა ქორწინება დაუშვებელია.

თუმცა, სამწუხაროდ სტატისტიკურ მონაცემებს რომ გადავხედოთ შევხვდებით ისეთ ფაქტებს, როცა ისევ გრძელდება ნაადრევი ქორწინების შემთხვევები. სახალხო დამცველის გასული წლის ანგარიშის მიხედვით, ბავშვზე ზრუნვის სააგენტომ 2020 წელს ადრეულ ასაკში ქორწინების 131 შემთხვევა შეისწავლა, ხოლო შსს-მ სავარაუდოდ დაწვრილ 132 ფაქტზე დაინყო გამოძიება, რომლის მოტივი ბავშვთან ქორწინება იყო.

სისხლის სამართლის კოდექსის 140-ე მუხლის მიხედვით კი სექსუალური ხასიათის კავშირი 16 წლამდე ასაკის არასრულწლოვნის მიმართ, ისჯება კანონით შვიდიდან – ცხრა წლამდე თავისუფლების აღკვეთით.

როგორც ასეთი მოზარდებს არ აქვთ ცნობიერება აღნიშნული საკითხების მიმართ, რომელიც ზემოთ აღვნიშნეთ, თუ რა სამართლებრივი ნორმები მოქმედებს ამ საკითხის ირგვლივ, ასევე არ იციან საკუთარი უფლებების შესახებ, რომელიც კონსტიტუციის მეორე თავშია აღნიშნული. უმეტეს შემთხვევაში ისინი ამ ნაბიჯს გაუცნობიერებლად დგამენ და მომავალში რა რისკის წინაშე შეიძლება დადგნენ, ამის შესახებ არ აქვთ წარმოდგენა, ამ თემის ირგვლივ არც სკოლაში არ საუბრობენ, რომ მიიღონ შესაბამისი ცოდნა და გააზრებული ჰქონდეთ ის შედეგები, რაც შეიძლება მოჰყვეს ამ ქმედებას.

აქედან გამომდინარე ვფიქრობ, რომ ნებისმიერი გადაწყვეტილება, რომელსაც ადამიანი იღებს ცხოვრების ნებისმიერ ეტაპზე, უნდა იყოს გააზრებული, რადგან თვითონ წყვეტს თავის ცხოვრებას და არავის აქვს უფლება ჩაერიოს პიროვნების პირად ცხოვრებაში. ასეთი ჩარევები სამწუხაროდ ხშირია ხოლმე, როგორც პირდაპირ, ისე ირიბად მესამე პირების მიერ, რადგან ჩვენი ცხოვრების სცენარისტიკა და მთავარი პერსონაჟებიც ჩვენ ვართ. თითოეული მოქმედება კი ჩვენს ხელშია და ამით განისაზღვრება ჩვენი მომავალი.

მარიამ გაბლიშვილი

ადამიანები დღითიდღე ვიზრდებით, ვვითარდებით, უამრავ ახალ ინფორმაციას ვიღებთ, რადგან სამყარო, სადაც ვცხოვრობთ, ისეთი მრავალფეროვანია და შესაძლებლობებით სავსე, რომ შეუძლებელია ამ გარემოს გვერდი ავუაროთ. ეს გამოწვეულია ტექნოლოგიების სწრაფად განვითარებით მართალია ტექნოლოგიებს, როგორც დადებითი ისე უარყოფითი ფაქტორები გააჩნია, მაგრამ სხვა დროსთან შედარებით, ახლა უფრო მეტი განვითარების და სწავლის შესაძლებლობა მოგვეცა. ადრე როცა უამრავი რესურსის დახარჯვა გვჭირდებოდა რაიმეს შესწავლის პროცესში, ახლა შესაძლებელია სახლიდან გაუსვლელადაც კი დავეუფლოთ სხვადასხვა ტექნიკებს ან პროფესიას, სამწუხარო კი ის არის, რომ ნაადრევად ადამიანები საკუთარი თავის ან მესამე პირის ინიციატივით კარგავენ ამ შანსს.

სწორედ აქედან გამომდინარე მინდა ვისაუბრო ნაადრევი ქორწინების შესახებ, თუ რა რისკის შემცველია ეს ყოველივე და თვითონ ახალგაზრდების ცხოვრებაში როგორ უარყოფითად მოქმედებს, იმის კითხვა, თუ რას ნიშნავს ნაადრევი ქორწინება? ეს არის ოფიციალური, ან არაოფიციალური კავშირი ორი ადამიანისა, რომელთაგან ერთ-ერთი მაინც 18 წლის ასაკს მიუღწეველია, ანუ ბავშვია.



სოციალური ქსელები და გამოწვევების წინაშე დამდგარი მოზარდ-ახალგაზრდები

მიანობის დაგეგმვისა და განხორციელების საჭიროება. ამ მიზნით, ასოციაცია ხშირად მართავს შეხვედრებს რეგიონებში მოზარდ-ახალგაზრდების თვითშეგნების ამაღლებისთვის, ჯანსაღი ცხოვრების წესთან და ქცევასთან დაკავშირებით.

სწორედ ასეთი ღონისძიებებისას გვიზიარებენ მოზარდ-ახალგაზრდები თავიანთ პირად ისტორიებს. შეხვედრებზე მოზარდები და ახალგაზრდები აღნიშნავენ, რომ თავს თავისუფლად გრძნობენ, უპრობლემოდ გვესაუბრებიან პირად თემებზე, ეს კი იმ სტიგმისგან თავისუფალი, ღია და სანდო გარემოს დამსახურებაა, რომელსაც ჩვენი შეხვედრებისას ვუქმნით მონაწილეებს. ისინი გვენდობიან და ჩვენში იმ უფროს ადამიანებს ხედავენ, ვისთანაც თავს უსაფრთხოდ გრძნობენ.

XXI საუკუნეში მოზარდ-ახალგაზრდების უმეტესობა დროის დიდ ნაწილს სოციალურ ქსელებში ატარებს. მართალია, ინტერნეტი და სხვადასხვა სოციალური არხები გვიმარტივებს ცხოვრებას, უმოკლეს დროში შესაძლებელია დაუკავშირდე ადამიანს მსოფლიოს ერთი ბოლოდან მეორეში, მოიძიო შენთვის სასურველი ინფორმაცია ნებისმიერ თემაზე, მიიღო განათლება, თუმცა ამ პროცესს თან ახლავს უდიდესი საფრთხე, როგორცაა კიბერ-ბულინგი, პირადი მონაცემების გაფორმის საშიშროება, სექსუალური ხასიათის შეტყობინებები. სამწუხაროდ, მოზარდ-ახალგაზრდები აღნიშნულ საკითხებზე ვერ ესაუბრებიან მშობლებსა და მასწავლებლებს. არ იციან რას გულისხმობს და როგორ დაიცვან პირადი სივრცე, სკოლებში არ არის ინტეგრირებული სექსუალური განათლება, რომელიც ინტერპერსონალური კომუნიკაციის საშუალება იძლევა მასწავლებლებსა და მოსწავლეებს შორის.

თუ ფიქრობთ, რომ თქვენი უფლებები ირღვევა დაგვიკავშირდით, ცხელი ხაზის ნომერზე და მიიღეთ ოურისტის უფასო კონსულტაცია, კონფიდენციალურად-032 20 11 221


ანი ჯაბახიძე
ასოციაცია „HERA XXI“-ის
ახალგაზრდული მუშაკი



„რამდენიმე თვის წინ, facebook-ზე უფროსმა მამაკაცმა მომწერა სექსუალური ხასიათის შეტყობინება, პირველად პასუხი რომ დაუბრუნე შემდეგ იმით მაშინებდა, რომ ჩემს მშობლებს ეტყოდა, რამდენი ხანია ვფიქრობ და ვერ ვხვდები მაინცდამაინც ჩემთან რატომ გაუჩნდა ურთიერთობის სურვილი, არასწორად ვიქცეოდი?, რამე არასწორად გავაკეთე?“ – 14 წლის გოგონა, გორიდან.

„მეც მქონდა მსგავსი შემთხვევა, ჩემი ფოტოების გაგზავნას მითხოვდა, დედას ვუთხარი და პოლიციაში ვუჩივლეთ. თავს იმართლებდა ვითომ ფიტნეს ინსტრუქტორი იყო და შესაბამისი კვების რაციონისა და სავარჯიშო პროგრამის შედგენისთვის მითხოვდა ფოტოების გაგზავნას“, – 16 წლის გოგონა წეროვანიდან.

2021 წელს ასოციაცია „HERA XXI“-ს მიერ ჩატარებულმა გამოკითხვამ ახალგაზრდებში აჩვენა, რომ მიუხედავად წინ გადადგმული ნაბიჯებისა, რეპროდუქციული ჯანმრთელობის, გენდერზე დაფუძნებული ძალადობისა და უსაფრთხო სივრცის შესახებ ინფორმაცია მწირია და დგას ცნობიერების ასამაღლებელი საქ-



„დედები, სხირად თავს დამნაშავედ ბრძნობენ, რომ შვილებთან ურთიერთობის დრო არ რჩებათ – ეს უნდა გამოსწორდეს“

დედები, რომლებიც არიან ძალიან დაკავებულნი, მათ აქვთ ძალიან დიდი დანაშაულის განცდა, იმის გამო, რომ სათანადო დროს ვერ ატარებენ შვილთან. ამ დროს მნიშვნელოვანია, ურთიერთობისას, რამდენად ჩართულები არიან ბავშვთან ერთად თუნდაც თამაშში ემოციურად და ა.შ. უნდა ეკითხებოდნენ ბავშვს, როგორ გაატარეს დრო, მნიშვნელოვანია არა მხოლოდ ფიზიკურად ერთად გაატარებული დრო, არამედ მთავრია რა ხარისხის ჩართულობა აქვს დედას ბავშვთან მიმართებაში. ასევე, ვურჩევდი მშობლებს საკუთარი დანაშაულის გრძობაზეც იმუშაონ, რადგან ძალიან მაგრები არიან. ამდენ რამეს, რომ აგვარებენ, ზრუნავენ სახლზე, შვილებზე, მოკლედ შეაქონ უფრო მეტად საკუთარი თავი.



მნიშვნელოვანია, რომ მშობლებს არ დაავიწყდეთ სხვა გასაკეთებელ საქმეებთან ერთად, ბავშვებთან ურთიერთობებიც რომ სასიცოცხლოდ მნიშვნელოვანია.

ლელა ცისკარიშვილი

ასევე ვურჩევდი მშობლებს, რომ ბავშვმა იცოდეს, ის ჩვენთან არის უსაფრთხოდ და ის უპირობოდ უყვართ და ეს არ არის დამოკიდებული იმაზე, მიღებენ თუ არა კარგ ნიშანს. ბავშვს უნდა მიეცეთ სივრცე, რომ გარშემო გამოიკვილოს გარემო, გავუღვივოთ ავტონომიურობა, ეს ცნობისმოყვარეობა და ავტონომიურობა გაღვივდება მაშინ, თუ ბავშვმა იცის, რომ ჩვენთან დაცულია და მას გარკვეული პასუხისმგებლობები გააჩნია, ასაკის შესაფერისი პასუხისმგებლობები, მაგალითად: სამი წლის ბავშვს უნდა შეეძლოს თავადვე დაგდებული სათამაშოს აღება, ხოლო მესამე ან მეხუთე კლასელი ბავშვი უნდა ანესრიგებდეს საკუთარ ოთახს.



15 წელში, ცხინვალთან ახლოს, ობგამოვლილმა ქალებმა ბაღ-ვინახების აყვავება შეძველით

ავისტოს ომის შემდეგ, სოფლად დაბრუნებულ მოსახლეობას სახლები გადამწვარი, ნაკვეთები გადამხმარი და ყველაფერი განადგურებული დაგვხვდა. ჩემი სოფელიც რამდენიმე კილომეტრითაა დაშორებული ცხინვალთან და მუდმივად შიშის ქვეშ გვინევს ცხოვრება.



მიუხედავად რთული მდგომარეობისა, მოვახერხეთ და შევძელით, რომ ამ 15 წელში, ყველაფერი ახლიდან დაგვეწყობოდა და საკუთარი მოსავალი წლიდან-წლამდე გაგვეუმჯობესებინა.

2008 წლის 7 ავისტოს რუსეთის ჯარი უკვე ჩვენი სოფლის სიახლოვეს იყო. ტყვიავიდან გვესმოდა აფეთქებები, მკვლევობები, მშვიდობიან მოსახლეობას სახლებს უწვავდნენ, რის შემდეგაც გავიქეციეთ თბილისში და დროებით, 21-ე სკოლის შენობას შევაფარეთ თავი.

დაბრუნებისას ყველაფერი გაცამტვერებული დაგვხვდა, მაგრამ ახლიდან ცხოვრება დავეიწყეთ. ბავშვობისას ოურისტობაზე ვოცნებობდი, მაგრამ მშობლები ადრეულ ასაკში გარდაგვეცვალა და ოთხი და, ნაომარ სოფელში დავრჩით. უფლება არ გვქონდა რამეს შევშინებოდით და მამაპაპისეული მიწა დაგვიწყობოდა. ამიტომ გადავწყვიტეთ, სოფლის მეურნეობაში აქტიურად ჩავართულიყავით და სხვა ქალების დასაქმების შესაძლებლობაც გვექონოდა. შრომა უკვალოდ არასდროს ჩაივლის და თანდათან გაცამტვერებულ ნაკვეთებზე ხილის, ბოსტნეულის და მარცვლეულის მოყვანა შევძელით.

დაგვაინწყდეს, რომ ამ დროს, ასეთ რთულ პირობებში შუახნის ქალებთან ერთად, 18-19 წლის გოგონებიც კი არ თაკილობენ ნაკვეთებში მუშაობას და ოჯახში მცირე შემოსავლის შესატანად თავებს არ ზოგა-



წელს დაახლოებით 100-მდე ქალი დავა-საქმეთ, როგორც სოფლებიდან, ისე გორიდანაც. ახლა უკვე ვაშლს და ატამს ვკრეფთ, შემოდის მსხალი, ცოტა ხანში ლობიოსაც ავიღებთ.

სოფლად ქალის ცხოვრება რთულია, მაგრამ თუ იშრომებს, ოჯახის გამოკვება არ გაუჭირდება. აპრილიდან გვიან შემოდგომამდე, ჩვენი სამუშაო დღე 09:00 საათიდან იწყება და 18:00 საათამდე გრძელდება. ზოგჯერ გაუსაძლისია პანაქება სიცხეში მუშაობა, მაგრამ ყველას კარგად გვესმის, რომ უშრომელად არაფერი მოდის. დღიურად დაახლოებით 45-50 ლარს გამოვიმუშავებთ. თუ წვიმიანი ამინდია, მხოლოდ მაშინაა ჩვენთვის დასვენების დღე. სხირად გვესმის, რომ სამუშაო ადგილები არ არის, გოგონები/ქალები ვერ საქმდებიან, მაგრამ არ უნდა

ვენ, ყოველდღიურ რეჟიმში მაქსიმალურად იხარჯებიან. რეგიონის ქალაქებიდანაც ჩამოდიან და სოფლად მცხოვრებ ქალებთან ერთად შრომობენ. იმისთვის, რომ სამუშაო და შემოსავალი გვექონდეს, უმაღლესი განათლების მიღება არაა აუცილებელი.

ქალების გარკვეული კატეგორია ზის სახლში და ფინანსურად სხვებზეა დამოკიდებული, რაც არასწორია. თუ ქალს ჯანმრთელობის მდგომარეობა ხელს უწყობს, შრომაში სათაკილო არაფერია. 22 წელი ქარხანაში ვმუშაობდი, მაგრამ ახლა სხვა რეალობა გვაქვს. მივდევ სოფლის მეურნეობას და შემოსავლის წყაროს ამ სფეროში, სხვა ქალებსაც ვუქმნი.

თეა რაზმაძე
გორის მუნიციპალიტეტის
სოფელი მარანა

„ომის შემდეგ ყველაფერი ნულიდან დავიწყე და ცხოვრებას დავნილოებაში, მომავლის იმედით ვაბრძობ“



„18 წელი სულ სროლები იყო ჩვენს ხეობაში, ამიტომ დაძაბულ სიტუაციას შეჩვეულები ვიყავით. იმ დროს გარეთ ვისხედით და ლობიოს ვარჩევდით. მოულოდნელად, ეზოში ჭურვი ჩამოვარდა და ისეთი ხმა ჰქონდა, 3 კვირა სმენა დამიქვეითდა“. – იხსენებს როზა ხაბალოვი. ომამდე 35 წელი ის ქირურგიულ განყოფილებაში მუშაობდა: „მნიშვნელობა არ ჰქონდა, სამკურნალოდ ოსი მოვიდოდა თუ ქართველი. ყველას ვემსახურებოდით“.

8 აგვისტოს ფეხით წამოვიდნენ, თავიდან საგარეჯოში ცხოვრობდნენ. როზა ხაბალოვი-მზარეულიშვილი 2013 წლიდან გორში, სკრის დევენილთა დასახლებაში, ოჯახის წევრებთან ერთად ცხოვრობს. და-ძმა ცხინვალში ჰყავს: „ტელეფონით ვეკონტაქტები ხოლმე. ძალიან მენატრებიან. დედა იქ გარდაიცვალა და მის საფლავზეც არ ვყოფილვარ“.

დაბრუნებაზე ხშირად ფიქრობს, მაგრამ ამის გზებს ვერ პოულობს.

„ქართველების და ოსების შერიგება... როგორ შერიგდებიან, თუ ჩვენ შორის მისვლა-მოსვლა არ იქნება. შუა ღამისას რომ მითხრან, დაბრუნება შეგიძლიათ, არც დავფიქრებდი, ავდგები და ფეხით წავალ“.

15 წლის განმავლობაში მის ცხოვრებაში ბევრი რამ შეიცვალა, ამბობს, რომ ყველაფერი თავიდან დაიწყო, თუმცა ცხოვრებისეულ სირთულეებს მაინც არ შეუშინდა.

„ომამდე ვცხოვრობდი დიდი ლიახვის ხეობის სოფელ ხეითში, მთელი ცხოვრება ამ სოფელში გავატარე. ვმუშაობდი ცხინვალის საავადმყოფოში. მყავდა მეგობრები, რომელიც ეროვნების მიხედვით არასოდეს გამირჩევია. 2008 წლის ომის შემდეგ ოჯახი, დაგვასახლეს სკრის დევენილთა დასახლებაში, ცხოვრება ნულიდან დავიწყე, ყველაფერი ნელ-ნელა შევიძინე საოჯახო ნივთები, აგრეთვე გავაშენე ჩემ კუთვნილ ნაკვეთში ვაზი, დავრგე ბალი,

ქლიავი, კაკალი. მომყავს მწვანელი, ყოველდღე მიწვეს ბაღში მუშაობა, ბოსტნეულის მოსაყვანად ზამთრისთვის, ვარ პენსიონერი და პენსია არ მყოფნის წამლებში. ვცდილობ მოსავალი მაინც მოვიყვანო რომ ვიარსებო. მინდა საქართველოში იყოს ბევრი ქარხანა, ფაბრიკები, სამუშაო ადგილები და ახალგაზრდები იყვნენ დასაქმებულნი. ჰქონდეთ მაღალი ანაზღაურება, და არ მიდიოდნენ საზღვარგარეთ სამუშაოდ, არ შორდებოდნენ დედეები შვილებს და შვილები დედეებს, მინდა ყველა ადამიანი კარგად ცხოვრობდეს და იყოს მშვიდობა მთელ მსოფლიოში“, – ამბობს როზა ხაბალოვი-მზარეულიშვილი.

ნინო ჩიბჩიური



2008 წლის აგვისტოში დედა არ გამოგვყვა სოფლიდან და ერთი თვის შემდეგ უკან შევბრუნდი მის მოსაძებნად..



2008 წლის 8 აგვისტომდე ცხინვალის რაიონის სოფელ ქემერტში ოჯახთან ერთად ვცხოვრობდი. ომამდე ვერასოდეს წარმოვიდგენდი, რომ საქმე აქამდე მივიდოდა, მე კი ყველაფრის დატოვება მომიწევდა.

ჩვენი სოფელი ქალაქ ცხინვალთან ძალიან ახლოსაა, სულ რამდენიმე კილომეტრითაა დაშორებული. წინა დღეებში ჯერ ცხინვალში გვესმოდა სროლა. 6 აგვისტოს ღამეს განათებული იყო ცხინვალის ცა. ისინი ამბობდნენ, ქართული მხარე ისროდაო. ქართული სოფლებიდან ცხინვალში ვერ შევდიოდით მაშინაც, ბოლო რამდენიმე წლის განმავლობაში ოსებს ცხინვალის გზა ჩაკეტილი ჰქონდათ ჩვენთვის.

ქართულ სოფლებში რუსები 7-ში და 8-ში შემოვიდნენ და დაიწყეს მასობრივი დაბომბვა. 8-ში უკვე იძულებული გავხდით ყველაფერი დაგვეტოვებინა და მეზობლის მანქანით თბილისისკენ გამოექცეულიყავით. 75 წლის დედაჩემი სახლში მარტო დარჩა იმ იმედით, რომ მალევე უკან დავბრუნდებოდი და მასაც წამოვიყვანდი.

უკვე გზაში ვიყავით, როცა ჩვენ მანქანას სნაიპერებმა ესროლეს. რალაც ადგილზე გავჩერდით და დავიშალეთ. სროლა როგორც კი შეწყდა, სიარული გავაგრძელეთ. გზად „ნივა“ ვნახეთ, იდგა, შიგნით დახოცილი ადამიანებით.

საგუშაგოებთან ქართველი პოლიციელები იდგნენ, ხელში მხოლოდ ავტომატები ეკავათ, ეს მაშინ, როცა რუსებს ყველანაირი საბრძოლო ტექნიკა ჰქონდათ. არ დამავინწყდება ამ პოლიციელების სახეები, შემეცოდნენ.

მთელი ჩვენი სოფელი გამოიქცა, მხოლოდ მოხუცები დარჩნენ. ის ოსებიც წამოვიდნენ აქეთ, ვინც თავს ქართველად მიიჩნევდა. საერთოდ, ჩვენთან რთული იყო გაგერჩია, ვინ იყო ოსი და ვინ ქართველი. ამიტომაც ჩვენ შორის ასეთი რამე არ უნდა მომხდარიყო.

როცა თბილისში ჩამოვედით, მუხიანში, სკოლაში მიგვეყვანეს. 8 აგვისტოდან 3 დეკემბრამდე იქ ვცხოვრობდით. მერე უკვე აქ, კოტეჯებში გავგვანაწილეს.

თბილისში ჩამოსვლიდან პირველი ორი კვირა ყოველდღე ვცდილობდი უკან გადასვლას და დედაჩემი წამოყვანას. „წითელ ჯვარშიც“ განვაცხადე, რომ იქ მოხუცი დედა დარჩა და ველარ გავდივართ კონტაქტზე. ცალკე ჩემი და-ძმა ეძებდა, ისინი ვლადიკავკაზში ცხოვრობდნენ.

უკვე 10 სექტემბერს ჩემმა ძმამ მოახერხა ვლადიკავკაზიდან იქ ჩასვლა და აქედან, როგორც იქნა, მეც შევეძელი წასვლა. ჩემი ძმა საგუშაგოსთან უნდა დამხვედროდა. ისე მოხდა, რომ აზერბაიჯანელებს თბილისიდან ცხინვალში გასაყიდად მწვანელი მიჰქონდათ სამარშრუტო ტაქსით. მეც მათთან ერთად წავედი. თან მეშინოდა, არავის ვეცნე.

ჩემი ძმა დამხვედა, ავედით სოფელში. ვერ წარმოვიდგენთ, რა დავგვხვდა. რუსებს მინასთან გაესწორებინათ იქაურობა. ყველაფერი გაძარცვული იყო. ყველგან საქონლის ლემი ეყარა. სადღაც რუსების შტაბი იყო. ცალკე მორიდიორები დადიოდნენ.

სახლში სამი ძალი მყავდა. ორი ცოცხალი იყო ჯერ კიდევ. როცა ძალებმა დამინახეს, წარმოუდგენელი რეაქცია ჰქონდათ სიხარულის... სახლიდან სამაზ-

სოვროდ ერთი ფინჯანი და ჩანგალი წამოვიღე.

დედა სახლში არ დავგვხვდა. ცხინვალში უკვე ქართველი ტყვეები ჩამოჰყავდათ და ამიტომაც იმ დღესვე ცხინვალში ადგილობრივ „წითელ ჯვარში“ განვაცხადეთ დედის დაკარგვის შესახებ. როცა ცხინვალიდან თბილისისკენ ვბრუნდებოდი, საგუშაგოზე უკვე აღარ მიშვედნენ ოსები. მოვიტყუე, რომ დედაჩემი გორში წაიყვანეს ტყვედ და წამოყვანა მინდა-მეთქი. მერე სამხედროების მანქანას გამოვიყვანი. გზაში ვუყურებდი გადამწვარ სოფლებს – ერგნეთს, ტირმნისს. სამხედროების მანქანა მალე გაფუჭდა და სამი კილომეტრი ფეხით ვიარე.

უკვე თბილისში ყოფნის დროს „წითელმა ჯვარმა“ დამირეკა, რომ დედა იპოვეს. თურმე მეხსიერება ჰქონია დაკარგული და ვერ გაიხსენა, ვინ იყო. შიშველი უპოვიათ ბაღში, საიდანაც აიყვანეს და მერე, სარდაფში ვიღაც უვლიდა მას. მოგვიანებით, ჩემმა დამ და ძმამ წაიყვანეს ვლადიკავკაზში. რამდენიმე წლის შემდეგ გარდაიცვალა, თუმცა მე ველარ მოვასწარი მისი ნახვა. საფლავიც კი არ მინახავს.

მე ზიზღი არ მაქვს დღეს ვინმეს მიმართ. მჯერა, რომ ხალხი ერთმანეთთან რომ მიუშვან, შერიგდებიან. ლაპარაკია საჭირო, ამის გარეშე წარმოუდგენელია ურთიერთობები. როცა ჩემი შვილი ცხინვალში დაპატიმრებული იყო და დაბრუნდა, ამბობდა, რომ ასაკოვანი ხალხი მის მიმართ კეთილგანწყობილი იყო. აი, ახალგაზრდებს კი უკვე ერთმანეთის ზიზღი აქვთ.

ომში მოგებული არავინაა.

ნათელა-გალინა ქელესხავეა,
შავეშების დევენილთა დასახლება

„პროექტი აბვისტოს ბოლოს სრულდება და შედეგები უკვე სახეზე გვაქვს“

„ქართული მედია ჯგუფის“ პროექტი დასასრულს უახლოვდება. ორგანიზაციის მიერ გადამზადებული ქალები, რომლებიც შიდა ქართლის ოთხივე მუნიციპალიტეტში მოქმედ მედიასაშუალებებს აკვირდებიან, საინტერესო ანგარიშს მოგვიზადებენ. მანამდე კი მონიტორინგის შედეგებზე ყოველთვიურად გადაცემაში „ქალის ხმა“ ვსაუბრობთ.

წინასწარი დაკვირვებით, მედიასაშუალებებში კაცების ხმა უფრო მეტად ისმის, ვიდრე ქალების. კვლევის ავტორების თქმით დისბალანსია ქალსა და კაც რესპონდენტებს შორის, ეს კი მკაფიოდ ჩანს პოლიტიკურ საკითხებზე მომზადებულ მასალებში.

გარდა მედიასაშუალებებისა, მონიტორინგი ხორციელდება გენდერულ საბჭოებთან დაკავშირებითაც, სადაც დაკვირვების პერიოდში მთელი რიგი დარღვევები გამოიკვეთა, რაც გულისხმობს იმას, რომ საბჭოების სხდომა თითქმის არ ტარდება ან თუ ტარდება ამის შესახებ საზოგადოება ინფორმირებული არ არის. გარდა ამისა, ქალებმა არ იციან თუ რა სერვისებით სარგებლობა შეუძლიათ.

პროექტი სრულდება და შემოიღია ვთქვა, რომ შედეგი უკვე სახეზეა – გენდერული საბჭოების სხდომა ჩვენი მონიტორინგის შემდეგ ოთხივე მუნიციპალიტეტში ჩაინიშნა, გარდა ამისა მათ დაგეგმეს სხვადასხვა აქტივობებიც, რაც შეეხება მედიასაშუალებებს გასული თვეებისგან, განსხვავებით მეტი დრო ეთმობა გენდერული საკითხების გაშუქებას, რაც ვთვლი, რომ ასევე მონიტორინგის შედეგია. ამასთან ერთად, რეგიონის მასშტაბით, ჩვენ გყავს უკვე 10 გადამზადებული ქალი, რომლებიც პროექტის დასრუ-



ლების შემდეგაც დააკვირდებიან საბჭოების მუშაობას და სხდომებსაც დაესწრებიან. მათ უკვე დაინიშნა სხვა ქალებისთვის ცოდნის გაზიარება. ჩვენ შევავაძეებთ მონიტორინგის შედეგებს აგვისტოს ბოლოს და ვრცელ ანგარიშს წარვუდგენთ საზოგადოებას. ასევე მოვამზადებთ სარეკომენდაციო ხასიათის წერილს, რომელსაც გენდერულ საბჭოებს გაუფრუგებთ.

აქვე სასიხარულოა ისიც, რომ გორში, გენდერული თანასწორობის საბჭოს წევრად „ქართულმა მედია ჯგუფმა“ კანდიდატი სწორედ პროექტის მონაწილე ქალებიდან წარადგინა, რაც უფრო ეფექტური მონიტორინგის გაგრძელების საფუძველს იძლევა.

„ქართული მედია ჯგუფი“ – შიდა ქართულში მოქმედ მედიასაშუალებებს „ქალთა

ფონდის“ მიერ მხარდაჭერილი პროექტის ფარგლებში აკვირდება. მონიტორინგს კი რეგიონის ოთხივე მუნიციპალიტეტიდან წარმოდგენილი სპეციალურად გადამზადებული ჯგუფი ახორციელებს. საბოლოო შედეგებს ორგანიზაცია პროექტის დასკვნით ღონისძიებაზე გააცნობს საზოგადოებას.

ლელა ლოზანიძე

კასპში „კომლი“ გაიხსნა – ინტერვიუ სოციალური საწარმოს დამფუძნებელთან

ევროკავშირის მხარდაჭერით კასპში სოციალური საწარმო „კომლი“ გაიხსნა. კომლი თანაშემწის სივრცეა, რომელიც ადგილობრივ მოსახლეობასთან და ვიზიტორებთან ერთად, ცდილობს ცოდნა გაათავისუფლოს აკადემიური ჩარჩოებიდან და არაფორმალური მიდგომებით, თანასწორობის, განათლების ხელმისაწვდომობისა თუ მრავალფეროვნების იდეები ყველასათვის ხელმისაწვდომი გახადოს.

სოციალური საწარმო „კომლი“ შექმნილია ევროკავშირის (European Union in Georgia) დაფინანსებით მიმდინარე პროექტის „სოციალური მენარმეობის განვითარება მდგრადი და ინკლუზიური საზოგადოებისთვის“ ფარგლებში, რომელსაც საქართველოს სტრატეგიული კვლევებისა და განვითარების ცენტრი (CSRDC) პარტნიორ ორგანიზაციებთან ერთად ახორციელებს.

უფრო დეტალურად, ამ იდეის და სამომავლო გეგმების შესახებ „კომლის“ დამფუძნებელი, თეონა დალაქიშვილი გვესაუბრება:

– თეონა, პირველ რიგში იდეის შესახებ რომ გვითხრა, რა იყო „კომლის“ დაარსების საფუძველი და გახსნის ღონისძიებაზე რა წარუდგინეთ საზოგადოებას?

– ყოველთვის გვსურდა გვექონოდა სივრცე, რომელიც ჩვენს ყველა პროექტს და იდეას გააერთიანებდა. მე თვითონ ვარ კასპიდან და ყოველთვის მსურდა ამ ქალაქში ყოფილიყო გარემო, საიდან წასვლაც ადამიანებს არ მოუნდებოდათ. როდესაც გავეცანი სხვადასხვა კვლევას, ვნახე, რომ უმეტესობა მთავარ პრობლემად სივრცის არარსებობას ასახელებდა, აქედან გამომდინარე დაიბადა „კომლის“ იდეა: სივრცე, სადაც შეგიძლია მუშაობა, თანაცხოვრება და თანაშემწე – ადგილი, საიდანაც დაიწყება ქალაქის გარდაქმნა. „კომლის“ იდეა გაჩნდა 2021 წელს და მაშინ ხელში მცირე თანხა და მიწა გვექონდა, თუმცა მალევე დავიწყეთ კამპანია. ჩვენი მისიაა, თემის განვითარებისთვის მდგრადი დაფინანსების შექმნა. სწორედ ამიტომ, „კომლის“ კონცეფცია ეფუძნება სოციალურ მენარმეობას.



ჩვენ გავხსენით არამხოლოდ სამუშაო სივრცე, არამედ ასევე ახალგაზრდული ჰოსტელი, სოციალური სივრცე, სადაც შეგიძლია ვუმუშაობდე 18 ადამიანს და გავუწიოთ სრული სერვისი: დარჩენა, კვება, ტრენინგი და მენტორინგი. მიღებული შემოსავალი კი სრულად მოხმარდება სათემო პროექტებს და ახალგაზრდების მხარდაჭერას.

– რა მიმართულებით გააგრძელებთ საქმიანობას, ვინ ხართ გუნდში და ა.შ.

– „კომლის“ გუნდი თავიდან სულ 2 ადამიანისგან შედგებოდა და დღეს უკვე 8 ადამიანი ვართ, უმეტესობა აქედან, ცხოვრობს კასპის სხვადასხვა სოფელში და ზუსტად იცნობს ადგილობრივ საჭიროებებს. ჩვენ ორი მიმართულებით ვაგრძელებთ მუშაობას, ეს არის სივრცის განვითარება და სათემო პროგრამების განვითარება, რომელიც მრავალფეროვან შესაძლებლობებს შესთავაზებს თემს, მათი განათლებისა და განვითარებისთვის.

– კასპში მცხოვრები ახალგაზრდებისთვის რა როლი ექნება „კომლს“ და აქამდე რა ძირითადი აქტივობები განახორციელეთ ოფიციალურად გახსნამდე?

– ოფიციალურ გახსნამდე საკმაოდ ბევრი საინტერესო აქტივობა გვექონდა, მოვიცავით კასპის ყველა სოფელი, ჩავატარეთ ბანაკები, დავწერეთ სათემო მენტორინგი, შევექმენით ახალგაზრდული სივრცეები. „კომლი“ – ეს არის ადგილი, სადაც შეგიძლია შექმნა რაღაც ახალი, განვითარდე, იპოვო საკუთარი თავი – ასე კომლს თავად ახალგაზრდები ახასიათებენ, და ჩვენი მიზანიც სწორედ ეს არის. „კომლი“ ღიაა ყველასათვის და მზად არის მუდმივად გვერდში დაუდგეს ადგილობრივ თემს და ახალგაზრდებს, რათა ერთად დავძლიოთ გამოწვევები. ახლაც ვაორგანიზებთ თანაშემწის შეხვედრებს, სადაც თემის წევრებთან ერთად განვიხილავთ ქალაქის და მუნიცი-

გაგრძელება მე-8 გვ.-ზე

კასპი „კომლი“ გაიხსნა – ინტერვიუ სოციალური საწარმოს დამფუძნებელთან

დასაწყისი მე-7 გვ.-ზე

პალიტიკის განვითარების შემდგომ სტრატეგიებს.

– რა საჭიროებები გამოიკვეთა ადგილზე ახალგაზრდებთან დაკავშირებით და რა სიახლეები ელოდებოდათ თქვენი მხრიდან მათ?

– საჭიროება არის უამრავი – კასპი იყო ადგილი, რომელიც ფაქტურად მოწყვეტილი იყო იმ პროცესებს, რაც მიმდინარეობდა სამოქალაქო საზოგადოებაში.

დღეს კასპელ ახალგაზრდებს აქვთ ნედრობა ყველანაირ ინფორმაციაზე, სერვისზე, შესაძლებლობაზე, უფრო მეტიც, მათ თავად შეუძლიათ ახალი იდეების განხორციელება და შესაძლებლობების შექმნა. ჩვენ მუდმივად მათთან ერთად ვიკვლევთ საჭიროებებს და მათთან ერთად ვგეგმავთ შემდგომ ნაბიჯებს. ახლა უკვე გვაქვს სივრცე და გადავდივართ ახალ ეტაპზე, სადაც ხელმისაწვდომს გავხდით ყველა ტიპის ცოდნას, რაც ასე საჭიროა ადგილობრივ დონეზე.

– ქალთა საკითხებს რა დროს უთმობთ და როგორ აპირებთ ადგილობრივი ქალების გაძლიერების ხელშეწყობას?

– ქალთა საკითხები ჩვენი ერთ-ერთი პრიორიტეტული მიმართულებაა. ჩვენ უკვე მეორე წელია ქალებს ვთავაზობთ შეხვედრებით შეხვედრებს, ასევე სამედიცინო კონსულტირებას, გადამისამართების სე-

რვისს. გარდა ამისა, დავინწყეთ ახალი კამპანია, რომელიც მენსტრუალურ სიღარიბეს ეხება.

„კომლი“ იქნება პირველი სივრცე, რომელიც სთავაზობს ქალებს და გოგონებს ჰიგიენურ ნივთებს უფასოდ, ეს არის პირველი სამუშაო სივრცე რეგიონში, რომელიც მსგავსი ინიციატივით გამოდის. ახლა კი ვინწყებთ კამპანიას, რომ მეტი სივრცე გახდეს მსგავსი ინიციატივაში ჩართული და ქალებს და გოგონებს შესთავაზოს უფასო ჰიგიენური ნივთები, რათა ერთად დავძლიოთ მენსტრუალური სიღარიბე.

– ვის და რა ფორმით შეეძლება „კომლის“ სივრცის გამოყენება და როგორ აპირებთ ორგანიზაცია სხვადასხვა ჯგუფების მხარდაჭერას ადგილზე და ზოგადად რეგიონში?

– „კომლი“ ღიაა ყველასთვის, ჩვენი დამოგანიზებული ღონისძიებების გარდა, მისი გამოყენება შეეძლება ყველას, ვინც იზიარებს ჩვენს ღირებულებებს. „კომლი“ სრულიად უფასოა მუნიციპალიტეტის წარმომადგენლებისთვის, ხოლო ჩამოსული ორგანიზაციებს დაბალფასიან სერვისს შესთავაზებს. ჩვენ მაქსიმალურად ვცდებით მხარი დაუჭიროთ ადგილობრივი ორგანიზაციების განვითარებას და ადგილობრივი ინიციატივების გაძლიერებას სივრცის და შესაბამისი ცოდნის მიწოდებით.

ესაუბრა ნინო ჩიბჩიური



სტირემოტიკების მიუხედავად ვებეზავ ბავშვი ფეხბურთს და ბავაბრძელო ჩემი ძველის სახელით საზღვრებს გარეთ ასპარეზობა



ფეხბურთით ბავშვობიდან დაინტერესებული ვარ და პატარაობიდანვე ამ სპორტის მიმართ ვგრძნობ დიდ სიყვარულს. 22 წლის ვარ და ამ დრომდე ყოველთვის ძალიან მინდოდა ფეხბურთი მეთამაშა პროფესიონალურ დონეზე და ეს ოცნებაც ამხდდა, უკვე მეშვიდე წელია ვთამაშობ კლუბში „გორი იუნაიტედი“. გუნდში დაახლოებით 20 გოგო ვართ, მაგრამ დღითიდღე მეტი გოგონა ინტერესდება ამ სპორტით და მეტი ერთგუება ამ საქმეში.

სტირემოტიკები ყოველთვის იყო, არის და იქნება, რადგან საზოგადოებას უჭირს აღიქვას ქალი სპორტში. მაგალითად, როგორცაა ძალისმიერი სპორტი, ფეხბურთი, რაგბი და სხვა. ოჯახიდან თითქმის ყველა უარყოფითად უყურებდა ჩემს ამ გადაწყვეტილებას და არ უნდოდათ ფეხბურთი მეთამაშა. მხარს მხოლოდ მამა მიჭერდა და მისი დახმარებით დღესაც ვაგრძელებ

თამაშს, მაგრამ თამაშის დაწყებიდან მალევე რამდენიმე თვეში საქართველოს ნაკრებში გამოიმძახეს, ჯერ 17 წლამდელთა ნაკრებში და მალევე 19 წლამდელთა ნაკრებში. როცა ეს ჩემმა ოჯახის წევრებმა ნახეს, მეტი მხარდაჭერა ვიგრძენი მათგან. ვგეგმავ ბოლომდე თავი მივუძღვნა ფეხბურთს, სადამდეც საშუალება მექნება ვითამაშებ, შემდეგ კი მწვრთნელობას ვაპირებ. ნაკრებში გამოძახების შემდეგ სინჯებზე დამაკვირდნენ და იმ 18 გოგოში მოვხვდი, ვინც სანრთველ შეკრებაზე დარჩებოდა და ამხანაგურ მატჩებში მიიღებდა მონაწილეობას. ამ პირველი შეკრების შემდეგ კარგი შთაბეჭდილება დავტოვე მწვრთნელებზე და მას შემდეგ ყოველთვის მიძახებდნენ, რაც ძალიან დიდ ბედნიერებას იწვევდა ჩემში, რადგან საზღვრებს გარეთ ჩემი ქვეყნის სახელით ვასპარეზობდი.

ნინო ფერაძე

პედაგოგიკა და პარტია

ყველასგან ცნობილია ის პარტიული კინკლაობა და ჟინი, რაც სამწუხაროდ ჩვენში ამ უამად არსებობს, ხშირად პარტიული ჯინი პირადობაზე გადადის და გუშინდელი მეგობრები დღეს დაუძინარი მტერნი გამხდარან ერთმანეთის. ეს უცნაური მოვლენაა, მაგრამ ფაქტი ფაქტია რჩება მანც: იდეური ბრძოლა – ეს ფრიად დასაფასებელი და ხალხის გონებრივი განვითარების მარჯვენა ხელი – პირადულ უთანხმოებათ, გამხდარა. ასეთია სავალალოდ დღევანდელი ჩვენი საზოგადოებრივი მდგომარეობა, პარტიულ ნიადაგზე აღმოცენებული, მაგრამ თუ პედაგოგიკაშიც – ამ წმინდათა წმინდა საქმეში – შეიჭრებოდა პარტიული ჟინიანობა – ეს აღარ მეგონა! როდესაც დასავლეთ საქართველოს სახალხო მასწავლებელთა კავშირის გამგეობის..... ევროპის გამოჩენილ პედაგოგებს შემოეხედნათ ქუთაისის თეატრში, იფიქრებდნენ, რომ იქ იყო პარლამენტარული არჩევნები და არა პედაგოგიური. დადლილ დაქანცული

თავმჯდომარე რამდენჯერმე იმეორებს ერთსა და იმავეს: „ბატონებო, კავშირის გამგეობაში არჩეულია ყველა პარტიელებიდან: 3 სოციალ-დემოკრატიელებიდან 3 სოციალისტ-ფედერალისტებიდან, 2 მსოციალისტ-რევოლუციონერებიდან და 1 ნაციონალ-დემოკრატიელებიდან“-ო. ასეთი განცხადების შემდეგ პარტიების წარმომადგენლობის რაოდენობაზე – ატყდება ერთი ყიჟინა და აურ-ზაური. აღარაფერი ესმით ერთი-მეორესი. პარტიული ჟინიანობით გააფთრებულებს აღარავის მოსდით თავში გააკრიტიკონ ის, თუ რამდენად გამოსადეგნი იქმებიან საქმისათვის არჩეული პირები! ბოლოს, ერთი პარტიის წარმომადგენლის გამოკლებით (მ.დ.) დათავდა როგორც იყო არჩევნები! როცა პირველად სახ. მასწ. კავშირი არსებობდა (1915 წ 27 დეკემბ.) გამოცხადებულ იყო, რომ ის იქნებოდა უპარტიო. დღეს კი იმდენი აურ-ზაური ატყდა კავშირის გამგეობის პარტიულ არჩევნებზე!

ვერ გამოგია – რა საჭიროა პედაგოგიკაში პარტია! ხომ ვერცერთი ნამდვილი პედაგოგი, რა პარტიისაც არ უნდა იყოს ის, ვერ გადაუხვევს საღ პედაგოგიკურ პრინციპებს! ეს პრინციპები კი ახალი პედაგოგიკის მოითხოვს პიროვნების ყოველმხრივ განვითარებას ნაციონალურ სკოლაში და არა პარტიობას. ჩვენ უნდა ვცთილობდეთ საზოგადოდ ყოველ საქმეში – და კერძოთ პედაგოგიკაში გვყავდეს ნამდვილი საქმის მცოდნე ხალხი რომელიც შეძლებენ სრულს გათვითცნობიერებას ბავშვის გონებისას და არა მარტო პარტიული პირები რომელთა პედაგოგიური ნიჭი და ცოდნა გაცნობილი არ არის.საბჭოს ყველა არსებულმა პარტიებმა ჩაუკვირდნენ ამ ნაკლს, და პარტიულს შექიშპებას, ნუ ამსხვერპლებენ ასეთს დიდ საქმეს, როგორც არის მომავალი თაობის ინტელექტუალური და ინდივიდუალური განვითარება.

ნინო ნადირაძე
1917 წელი, №6



გაზათი გამოიცემა „ქართული მედია ჯგუფის“ პროექტის („სამართლებრივი ქალისა“ – ჟინინისტური მედია შიდა ქართლში“) ფარგლებში, რომელიც მხარდაჭერილია „ქალთა ფონდის“ მიერ



ქალთა ფონდი საქართველოში
WOMEN'S FUND IN GEORGIA